

Poruka supervizora Rodericka Moorea građanima Brčkog

Drage Brčanke i Brčaci,

Vjerovatno ste čuli da sam nedavno donio odluku da od danas, 31. augusta/kolovoza 2012. godine, “suspendiram” režim supervizije. Želio sam vam reći više o ovoj odluci i šta ona znači za građane Distrikta.

Od danas se zatvara Ured visokog predstavnika u Brčkom. Moj tim i ja nećemo više intervenirati u dešavanjima u Distriktu niti nadzirati sjednice vlade i drugih tijela. Nećemo donositi obavezujuće naloge, niti posredovati u nalaženju rješenja. Nećemo se miješati da bismo rješavali probleme. Iako ću i dalje ostati supervizor s istim ovlastima kao i do sada, ne očekujem da će biti potrebno da ih iskoristim u budućnosti.

To ne znači da ne vidimo izazove sa kojima se Distrikt suočava. Vidimo. Štaviše, slažem se sa svima vama od kojih sam iz prve ruke čuo kako ima previše siromaštva, nezaposlenosti, nepotizma, korupcije, birokracije i drugih problema u Brčkom. Međutim, međunarodna zajednica smatra da su vaše institucije sposobne da se samostalno pozabave ovim izazovima. Želimo da demokratski izabrane Brčanke i Brčaci, a ne imenovani stranci, preuzmu punu odgovornost za upravljanje Distriktom.

Uprkos suspenziji supervizije, međunarodna zajednica ne napušta Brčko. Daleko od toga. Predstavnici Europske unije, OSCE-a, Sjedinjenih Američkih Država i mnogih drugih i dalje će biti aktivno angažirani u Brčkom. Štaviše, brojni sigurnosni mehanizmi ostaju na snazi ukoliko bi se situacija razvijala u negativnom pravcu, a mi se, naravno, nadamo da se to neće desiti. Pored mene, visoki predstavnik, Arbitražni tribunal i Ustavni sud BiH također zadržavaju ovlasti da, ukoliko bude potrebno, zaštite napredak koji je postignut u

Brčkom.

S pravom biste trebali biti ponosni na ono što ste postigli u Brčkom od završetka rata. Transformirali ste fizički uništeno, socijalno urušeno i ratom podijeljeno društvo. Omogućili ste svojim susjedima, raseljenim uslijed rata, da se vrate kući. Nekadašnje linije sukoba zamijenili ste multietničkim školama, naseljima i institucijama. Vaša hrabrost, pristojnost i tolerancija dramatično su promijenili Brčko nabolje u proteklih petnaest godina.

Sada vi i vaši sugrađani imate još jednu ulogu kako biste osigurali da i sljedeće poglavlje bude jednako uspješno kao i ona prethodna – prije svega tako što ćete od izabranih lidera tražiti da upravljaju pošteno, transparentno i u kolektivnom interesu vašega grada. To je najmanje što čestite Brčanke i Brčaci zaslužuju.

Hvala vam na otvorenosti, ljubaznosti i gostoprimstvu koje ste mi ukazali u posljednje dvije godine. Nadam se da ću se s puno vas i dalje sretati u budućnosti.

Sve najbolje,

Roderick W. Moore